

**BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINA KAKANJ  
Općinsko vijeće**

**Broj:** 01/1-32-Z/23  
**Kakanj,** 28.09.2023. godine

**Z A P I S N I K**  
**sa 32. redovne sjednice Općinskog vijeća održane 28.09.2023. godine (četvrtak)**  
**u sali Općinskog vijeća sa početkom u 9:00 sati**  
**(sažetak zapisnika)**

Predsjedavajući Općinskog vijeća Slaven Katičić je pozdravio prisutne i otvorio 32. redovnu sjednicu Općinskog vijeća.

Prije početka sjednice i utvrđivanja kvoruma svečanu izjavu je dao vijećnik Kenan Kozlo (SDA), a nakon prestanka mandata vijećniku Aldinu Šljivi (SDA).

Predsjedavajući je zamolio da vijećnici i vijećnice prijave svoje prisustvo.

Vijećnici i vijećnice prisutni na sjednici:

Izudin Pušćul, Omer Musić, Nerma Aliefendić, Safet Šahman, Mejrema Purišević, Mediha Mamela, Namir Talić, Adis Mrkonjić, Elvir Delibašić, Amar Selimović, Kenan Kozlo i Izudin Hrusto (**naknadno pristupio**) (**SDA**)

Vinka Aletović, Ahmed Begić, Miroslav Spasojević i Edin Šljivo (**SDP BiH**)

Zerina Kovač, Mirsad Tursum, Fakir Ajdinović i Sabit Čehajić (**S BiH**)

Dževdet Huskić, Marcela Ravlja i Branko Češljić (**naknadno pristupio**) (**NS**)

Enver Merdić (**naknadno pristupio**) i Mugdin Gorak (**naknadno pristupio**) (**SBB BiH**)

Adnan Čobo i Armin Bašić (**DF**)

Slaven Katičić (**HDZ BiH**)

Mujo Fafulić (**nacionalna manjina**)

**Odsutni vijećnici:** Džemal Bečirhodžić (**SDA**)

Predsjedavajući je konstatovao da je na sjednici u momentu prijave prisutno 25 vijećnika i vijećnica, te su se stekli svi potrebni uslovi za validan rad i odlučivanje Općinskog vijeća.

Pored vijećnika sjednici su prisustvovali:

**Mirnes Bajtarević**, općinski načelnik

**Emir Zaimović**, sekretar Općinskog vijeća – po ovlaštenju

**Džihad Berbić**, pomoćnik općinskog načelnika za finansije

**Mirza Fazlić**, pomoćnik općinskog načelnika za privredu, urbanizam i zaštitu okoline

**Bahrudin Arnaut**, pomoćnik općinskog načelnika za opću upravu radne i zajedničke poslove, lokalnu samoupravu i mjesne zajednice

**Edin Aliefendić**, pomoćnik općinskog načelnika za društvene djelatnosti, boračka pitanja, raseljena lica, izbjeglice i povratnike

**Nurudin Hrusto**, pomoćnik općinskog načelnika za civilnu zaštitu

**Mukades Delibašić**, pomoćnik općinskog načelnika za imovinskopravne, geodetske poslove i katastar nekretnina

**Zijad Neimarlija**, direktor Zavoda za planiranje i izgradnju općine Kakanj

**Mahir Sikira**, šef Stručne službe za poslove Općinskog načelnika

### **Izvjestiocici, obradivači, gosti**

**Vesna Ajanović**, općinski pravobranilac

**Mirza Smajić**, komandir Policijske stanice Kakanj

Predstavnici Općine Rogatica

### **Predstavnici medija**

**NTV IC Kakanj**

**Radio Kakanj**

### **Napomene o radu Kolegija Općinskog vijeća**

U pripremi 32. redovne sjednice Općinskoga vijeća, Kolegij Općinskog vijeća je 20.09.2023. godine, održao sjednicu na kojoj je razmatrao:

#### **a) Vijećničku inicijativu Adnana Čobe**

Vijećnička inicijativa je primljena k znanju.

#### **b) Zahtjev MZ Čatići za odvoz luga**

Zahtjev je proslijeđen Službi za privredu, urbanizam i zaštitu okoline i JP „Vodokom“ d.o.o. Kakanj na razmatranje i dalje postupanje.

#### **c) Zahtjev TD „Nova trgovina-S“ d.o.o. Kakanj**

Zahtjev je proslijeđen općinskom načelniku i Općinskom pravobranilaštву na razmatranje i izjašnjenje.

### **Usvajanje zapisnika sa 31. redovne sjednice Općinskog vijeća**

Nije bilo diskusije o zapisniku i isti je usvojen sa 21 glasom ZA, bez glasova PROTIV i 2 glasa UZDRŽAN.

### **Komentari na dostavljene odgovore na vijećnička pitanja**

**Izudin Pušćul:** je komentarisao odgovor na pitanje u vezi održavanja press konferencije političkog subjekta NS u prostorijama JU „Gradska biblioteka“. Rekao je da su u odgovoru navedene evidentno nelogične stvari, gdje se između ostalog navodi da je tom prilikom objavljena vijest da su odobrena sredstva za rekonstrukciju i obnovu prostorija Gradske biblioteke, te se smatra logičnim da se takva vijest objavi u prostorijama Gradske biblioteke. U vezi tog dijela odgovora je rekao da se nije radilo o objavi predmetne vijesti, već o press konferencije stranke NS, što je i navedeno u uvodnom dijelu odgovora od strane direktora JU. Rekao je da ne bi bilo ništa sporno da je direktor pozvao medije i objavio da će se u Gradsku biblioteku uložiti značajna sredstva što će doprinijeti boljem i kvalitetnijem radu JU. Napomenuo je da su predmetna sredstva izdvojena iz Budžeta ZDK kojeg pune i građani Kakanja, a ne iz sredstava političkog subjekta NS. Na kraju je rekao da se nada da se slične stvari neće dešavati u budućnosti i da vjeruje da se u ovom slučaju radilo o nepromišljenom potezu direktora JU i političkog subjekta NS.

### **Komentari na dostavljena mišljenja na vijećničke inicijative**

**Armin Bašić:** je rekao da se postupilo po njegovoj inicijativi za orezivanje stabala i rastinja u užoj gradskoj zoni, te je napomenuo da se ubuduće povede više računa o vertikalnom profilu puta, gdje slobodni profil puta mora biti u visini od 4,5 m iznad kolovoza.

## Vijećnička pitanja

**Marcela Ravlija:** je postavila vijećničko pitanje u čijoj je nadležnosti održavanje rudničkog Spomen parka? Smatra da rudnički park, spomen obilježe rudarima poginulim u katastrofi 7. juna 1965. godine, kao jedan od simbola Kaknja, ne zaslužuje da se održava samo nekoliko dana u godini pred obilježavanje značajnih datuma. Ostalim danima u godini park je zapušten, prljav i najblaže rečeno neuređen.

**Safet Šahman:** je postavio vijećničko pitanje kakvi su planovi i da li se planira dionica puta prema Brnjicu pustiti u promet prije zime, obzirom da se trenutno vrši sanacija klizišta na toj dionici puta?

**Dževdet Huskić:** je postavio dva vijećnička pitanja. Prvo je postoje li mjerljivi rezultati uvođenja video-nadzora u Kaknju i koliko je danas, 7,5 godina od instaliranja, video-nadzor u Kaknju operativan? Obzirom na značajna ulaganja u video-nadzor na području općine, te najavu načelnika za dodatna ulaganja, zanima ga postoji li analiza opravdanosti i postoje li mjerljivi rezultati uvođenja video-nadzora u Kaknju, kao i kakvo je danas stanje s opremom i kamerama i koliko je isti zaista operativan i u službi policijskim službenicima? Drugo pitanje je na osnovu kojeg dokumenta ili elaborata je svojevremeno postavljen saobraćajni znak II-24 „zabrana saobraćaja za vozila čija ukupna masa prelazi određenu masu (8t)“ i na osnovu kojeg dokumenta ili elaborata je ovaj znak uklonjen 2014. godine? Navodi da se radi o dionici puta R-445 koja prolazi kroz MZ Doboј, Kakanj – Visoko – Podlugovi, a riječ je o znaku koji je uklonjen na kružnom toku i ispred mosta na rijeci Bosni.

**Vinka Aletović:** je postavila vijećničko pitanje kada se planira postaviti rasvjetni stub kod izvorišta pitke vode (Ćamilova česma u ulici 29. novembar)? Navodi da se radi o jednom od rijetkih izvora pitke vode na području MZ Doboј, kojeg pored mještana Doboјa koristi i veliki dio stanovništva općine Kakanj, gdje se nesigurno kretati noću obzirom da se česma nalazi uz rub lokalnog puta Doboј – Banjevac, koji je izuzetno frekventan.

**Armin Bašić:** je postavio vijećničko pitanje u kojoj fazi se nalazi i kada se konačno planira realizacija projekta javne rasvjete u MZ Koprivnica?

Predsjedavajući je konstatovao da su vijećnici: Elvir Delibašić, Sabit Čehajić i Namir Talić postavili vijećničko pitanje bez korištenja govornice.

**Elvir Delibašić:** je postavio vijećničko pitanje kada će početi izgradnja dječijeg igrališta/poligona u MZ Čatići – Hrasno, uz napomenu da je obezbijeđeno zemljište i nešto novca za izgradnju istog?

**Sabit Čehajić:** je postavio vijećničko pitanje kada će početi procedura povrata u posjed parcella vlasnicima, koje su izostavljene avio snimanjem, koje nisu uvedene po novom premjeru u katastru, a iste su po starom broju u ZK uredu upisane kao privatno vlasništvo?

**Namir Talić:** je postavio vijećničko pitanje šta općinsko pravobranilaštvo radi po pitanju problema/spora sa Hidrogradnjom koja osporava i onemogućuje bilo kakve radove na dionici puta Kamenolom – Brnj tvrdeći da put prolazi kroz njihovo polje rada, te kada se može očekivati rješenje tog problema?

## Vijećničke inicijative

**Armin Bašić:** je pokrenuo vijećničku inicijativu prema nadležnom ministarstvu i općinskom načelniku za donaciju ili uvrštavanje u budžet finansijskih sredstava neophodnih za nabavku potrebne opreme (lopte, strunjače, oprema za gimnastiku i ostale sportove) i nastavnih pomagala za održavanje nastave u OŠ „Ahmed Muratbegović“ u Bilješevu, te sanaciju sportskog poligona, montažu zaštitne mreže kojom bi se zaštitili privatni objekti u neposrednoj blizini, kao i za rješavanje ostalih poteškoća sa kojima se susreću učenici i nastavno osoblje škole.

**Safet Šahman:** je pokrenuo vijećničku inicijativu da se usklade putevi na raskrsnici Kakanj – Brnjic – Mramor, te da se odredi jedna trasa puta prema naseljenim mjestima jer se trenutno stanovništvo i oni koji tuda prolaze teško snalaze uslijed postojanja više puteva. Potreno je postaviti saobraćajne znakove.

**Dževdet Huskić:** je pokrenuo dvije vijećničke inicijative. Prva inicijativa je da se sjednice Općinskog vijeća održavaju nedjeljom. Podsjetio je da je ranije predlagao da se pristupi izradi odluke o utvrđivanju radne sedmice na prostoru općine kojom bi se zabranio rad nedjeljom fizičkih i pravnih osoba iz djelatnosti trgovine, građevinarstva, mesnice, apoteka, pekara, kladionica i benzinskih pumpi, a čija svrha je bila da se zaštite ljudska i radnička prava sugrađana i sugrađanki. Smatra da bi održavanje sjednica nedjeljom bio jedan od načina da se pokaže solidarnost sa mnogima koji nedjeljom rade. Druga inicijativa je da se prije i poslije pješačkog prelaza preko puta zanatskog centra u ul. Rudarska postave usporivači brzine. Smatra da je raskrsnica kod ulaza u RMU (gornja direkcija) postala jedno od najopasnijih mesta u gradu za motorni saobraćaj i za kretanje pješaka i biciklista, te ju je potrebno hitno adaptirati na način da se poveća sigurnost u ovom dijelu ulice. Do trajnjeg i boljeg rješenja predlaže ugradnju usporivača brzine.

**Marcela Ravlija:** je pokrenula dvije vijećničke inicijative. Prva je za izradu elaborata za utvrđivanje granica vodnog dobra uz rijeku Bosnu na području općine Kakanj. Inicijativu je podnijela zbog činjenice da je izražena uzurpacija i devastacija vodnog dobra uz rijeku Bosnu od strane pojedinaca, pri čemu se onemogućava pristup samoj rijeci na mjestima gdje su napravljeni nelegalni objekti. Druga inicijativa se odnosi na revidiranje plana odvoza smeća i izgradnju dodatnih podzemnih kontejnera. Smatra da je neophodno na određenim lokacijama izgraditi ili postaviti dodatne kontejnere zbog činjenice da je u posljednjih godinu dana u užem gradskom jezgru, kao i na određenim dijelovima općine uočena velika količina smeća uz same kontejnere. Isti problem je prisutan i na izletištu Ponijeri gdje je oko kontejnera stvorena deponija smeća što narušava sliku Ponijera kao turističkog mesta.

**Fakir Ajdinović:** je pokrenuo dvije vijećničke inicijative. Prva je da se u Budžetu Općine Kakanj za 2024. godinu planira povećanje plaće za radnike JU Centar za socijalni rad Kakanj za 10%, obzirom na porast troškova života kao i činjenicu da se od 2009. godine u JU nije mijenjala plaća radnika, ili eventualno da se izjednače plaće radnika i osnovna plaća svih budžetskih korisnika, sa plaćama u organu uprave. Druga inicijativa je da nadležne Komisije imaju oprezniji pristup prilikom imenovanja lica u organe javnih ustanova i javnih preduzeća čiji je osnivač Općina Kakanj, obzirom da vlada negodovanje građana po pitanju imenovanja određenih osoba koje su oštetile Budžet Općine Kakanj kao i budžete javnih preduzeća i ustanova.

**Slaven Katičić:** je pokrenuo vijećničku inicijativu da se izvrši stručna analiza područja močvare „Bistrik“ kako bi se definisalo područje, odnosno obuhvat koji je potreban za nesmetano funkcioniranje močvarnog područja, te da se na istom proglaši javni interes i izvrši eksproprijacija zemljišta kako bi se zaštitili privatni posjedi kojima se nanosi šteta. Smatra da močvara „Bistrik“ u turističkom smislu posjeduje potencijal, a ista može biti sastavni dio biciklističke rute Kakanj – Kraljeva Sutjeska kao mjesto odmora u prirodi uz uvjet da se zaštite privatni posjedi, spriječi devastacija i eksproprije potreban obukvat za funkcioniranje tog područja.

**Adnan Čobo:** je pokrenuo dvije vijećničke inicijative. Prva je da se preko puta zgrade „Trgošped II“ u pravcu prema OŠ „Mula Mustafa Bašeskija“ označi pješački prelaz zbog otežanog pristupa pješacima trotoaru koji se nalazi na suprotnoj strani od pomenute zgrade. Druga inicijativa je da se organizuje prevoz za učenike od I do IV razreda osnovne škole na realciji od kuće do škole. Predlaže da se isto organizuje na kvalitetan način, u smislu da se u svakom autobusu/minibusu nalazi osim vozača i stručno lice koje će primiti dijete u autobus i predati ga odgovornim licima u školi.

**Vinka Aletović:** je pokrenula vijećničku inicijativu za uvođenje video-nadzora na području vikend naselja Ponijeri zbog činjenice da se na području Ponijera proteže regionalni put Kraljeva Sutjeska – Ponijeri – Zavidovići na koji su povezani putevi prema općinama Vareš i Zenica. Zbog sve češćih obijanja vikendica i činjenice da u vikend naselju nema stalnog prisustva policije, predlaže ugradnju video-nadzora.

Predsjedavajući je konstatovao da su vijećnici: Elvir Delibašić, Namir Talić, Mejrema Purišević, Miroslav Spasojević i Amar Selimović podnijeli vijećničke inicijative bez korištenja govornice.

**Elvir Delibašić:** je pokrenuo dvije vijećničke inicijative. Prva je da se riješi suženje puta na relaciji Separacija – „Delta Petrol“ zbog postojanja dva šahta na toj dionici koji ugrožavaju sigurnost vozila, te znatno sužavaju cestu. Druga inicijativa je da se riješi odvod oborinskih voda kod podvožnjaka u

Papratnici. Navodi da predmetni podvožnjak jedini predstavlja pristup prema više naseljenih mjesta (Papratnica, Kujavče, Naselje TE i Javor), a prilikom svake malo jače kiše isti se napuni i ta mjesta ostanu odsječena.

**Namir Talić:** je pokrenuo vijećničku inicijativu da se uredi i asfaltira staza od pošte prema kapiji bivše Stare jame. Navodi da se radi o stazi koju često koriste sugrađani, a koja povezuje Plandište i ulicu ZPO-a sa gradskom jezgrom, te bi se asfaltiranjem iste uveliko olakšalo kretanje sugrađana koji žive u tom dijelu grada.

**Mejrema Purišević:** je pokrenula dvije vijećničke inicijative. Prva inicijativa je za nastavak asfaltiranja ulice Patriotske lige obzirom da je prošle godine asfaltirano cca 50m, a postojeći asfalt je neuslovan i dotrajao. Druga inicijativa se odnosi na izradu glavnog projekta topplifikacije ulice Patriotske lige. Inicijativu podnosi zbog činjenice da je topplificiran samo kraj i početak navedene ulice, a ostalo je oko 100 domaćinstava koja koriste svoje kotlovnice i prave veliko zagađenje zraka u mjesecima kada su u gradu aktivna i ostala ložišta.

**Miroslav Spasojević:** je pokrenuo vijećničku inicijativu za postavljanje putokaza za naselja: Turalići – iza ambulante u Brnjicu – prije prvog mosta lijevo; Vukanovići – u Ivnici desno; Poljice – velika krivina iza fabrike DSM u Čatićima desno i ostala neobilježena naselja ukoliko ih ima.

**Amar Selimović:** je pokrenuo vijećničku inicijativu za obilježavanje pješačkih prelaza (zebri) na lokaciji Šehidske česme na Vardi i na lokaciji bivše radnje Technomedia kod Pokopnog društva.

### **Utvrđivanje dnevnog reda**

Predsjedavajući je za 32. redovnu sjednicu predložio dnevni red koji je usaglašen na sjednici Kolegija i predložio da se u dnevni red uvrsti naknadno pristigli materijal „Prijedlog odluke o davanju saglasnosti za uspostavu zaštićenog područja "Gornja Trstionica – Bukovica" Kakanj“ (tačka 7. dnevnog reda).

Kako nije bilo primjedbi na predloženi dnevni red isti je jednoglasno usvojen sa 27 glasova ZA.

### **Usvojeni dnevni red**

1. Prijedlog odluke o izmjenama i dopunama Budžeta Općine Kakanj za 2023. godinu
2. Prijedlog odluke o dopuni Odluke o izvršavanju Budžeta Općine Kakanj za 2023. godinu
3. Razmatranje Izvještaja o izvršenju Budžeta Općine Kakanj za period 01.01 – 30.06.2023. godine
4. Razmatranje Izvještaja o izvršenju Tekuće budžetske rezerve za period 01.01 – 30.06.2023. godine
5. Prijedlog odluke o dopuni Odluke o subvencioniranju kamata za rješavanje stambenog pitanja mlađih i refundiranju troškova ishodovanja rješenja o odobrenju izgradnje/urbanističke saglasnosti koja važi kao odobrenje za izgradnju
6. Prijedlog odluke o imenovanju općinskog pravobranioca
7. Prijedlog odluke o davanju saglasnosti za uspostavu zaštićenog područja „Gornja Trstionica – Bukovica“
8. Razmatranje Izvještaja o radu Komisije za provođenje javnog nadmetanja – licitacije pri prodaji poslovnih prostora u vlasništvu Općine Kakanj s prijedlogom zaključka o utvrđivanju visine naknade za rad Komisije
9. Prijedlog rješenja o imenovanju Komisije za utvrđivanje kriterija, postupka, načina davanja i izmjene naziva ulica, trgova, parkova, mostova, institucija, ustanova i naseljenih mjesta na području općine Kakanj
10. Inicijativa građana o izdvajanju Novog Naselja Bare iz MZ Kakanj I i pridruživanju MZ Plandište
11. Prijedlog rješenja o razrješenju Fakira Ajdinovića na mjestu predsjednika Komisije za Statut i propise
12. Prijedlog rješenja o imenovanju predsjednika Komisije za Statut i propise
13. Informacija o problematici korištenja, raspolaganja i upravljanja autobuskom stanicom u Kakanju
14. Informacija o stanju sigurnosti na području Policijske stanice Kakanj za 2022. godinu

Vijeće je vodilo objedinjenu raspravu po tačkama 1. i 2. dnevnog reda, a glasanje je obavljeno pojedinačno.

## **1. Prijedlog odluke o izmjenama i dopunama Budžeta Općine Kakanj za 2023. godinu**

## **2. Prijedlog odluke o dopuni Odluke o izvršavanju Budžeta Općine Kakanj za 2023. godinu**

**Predlaqač:** Općinski načelnik

**Obradivač:** Služba za finansije

**Izvjestilac:** Džihad Berbić, pomoćnik općinskog načelnika

U diskusiji je učestvovala Marcela Ravlija.

**Marcela Ravlija:** se osvrnula na sredstva koja su opredjeljena u Službi za privredu, urbanizam i zaštitu okoline, a koja se odnose na tri stavke izdataka za informisanje i to: Izdaci za informisanje - Fond okoliša u iznosu od 40 hiljada KM, Izdaci za informisanje iz Programa poticaja poljoprivrednoj proizvodnji u iznosu od 15 hiljada KM i Izdaci za informisanje iz Programa „Subvencije za poticaj razvoja poduzetništva i obrta“ u iznosu od 20 hiljada KM, što ukupno iznosi 75 hiljada KM za informisanje. Također, rekla je da se iz Izvještaja o izvršenju Budžeta za prvi šest mjeseci može vidjeti da je po prvoj stavci utrošeno 1.657 KM, po drugoj nije utrošeno ništa i po trećoj 1.123 KM. U vezi s tim je podsjetila da je na 30. sjednici Vijeća bilo govora o obaveznoj imunizaciji djece predškolskog i školskog uzrasta koji podaci su poražavajući, te s toga predlaže da se od naprijed navedenih sredstava za informisanje izdvoji 30 hiljada KM za svrhu provođenja aktivnosti povećanja svijesti o obaveznoj imunizaciji kroz održavanje predavanja na tu temu, zatim izradu brošura, uključivanje medija u tu svrhu i druge aktivnosti koje bi imale za cilj podizanje nivoa imunizacije. Na kraju je podsjetila da je u Strategiji razvoja Općine Kakanj, kao jedan od strateških ciljeva navedeno, povećanje stepena vakcinacije djece predškolskog i školskog uzrasta.

**Džihad Berbić (odgovor):** je pojasnio da se navedene pozicije ne mijenjaju, što se vidi iz kolone I i kolone II koje su iste. Podsjetio je da su sve tri pozicije usvojene kroz pograme Vijeća i u toku je implementacija istih. Rekao je da nije od značaja što su sa 30.06. neke pozicije realizovane u većem ili manjem procentu, obzirom da će do kraja godine sve biti realizovane vjerovatno u cijelosti.

**Mirza Fazlić (odgovor):** je rekao da bi volio da je predloženo da se sve tri pozicije vrate na stanje kako je ranije bilo, jer se stvorila nepotrebna konfuzija i sumnja oko utroška tih sredstava. Pojasnio je da su predmetna sredstva izvorno poticajna sredstva (troše se na snimanje emisija pri realizaciji projekata iz oblasti privrede i poduzetništva, zatim za oblast poljoprivredne proizvodnje i aktivnosti koje su vezane za poljoprivrednu, te za kampanje oko ekoloških aktivnosti koje imaju za cilj podizanje svijesti građana prilikom korištenja prirodnih resursa i dr.). Smatra da je Služba za finansije napravila veliki problem zbog insistiranja da se predmetne stavke vode kao sredstva za informisanje. Rekao je da se slaže sa prijedlogom vijećnice Ravlija da se izdvoje sredstva za povećanja svijesti o obaveznoj imunizaciji, ukoliko je moguće u Budžetu izdvojiti ta sredstva, dok je po pitanju predmetnih sredstava rekao da su za utrošak istih potpisani ugovori, a trenutno nisu utrošena jer se aktivnosti provode periodično i u fazama kako je potrebno, ali će u svakom slučaju biti utrošena do kraja godine.

Nakon diskusije Vijeće je usvojilo Odluku o izmjenama i dopunama Budžeta Općine Kakanj za 2023. godinu i Odluku o dopuni Odluke o izvršavanju Budžeta Općine Kakanj za 2023. godinu, jednoglasno sa 28 glasova ZA.

Vijeće je vodilo objedinjenu raspravu po tačkama 3. i 4. dnevnog reda, a glasanje je obavljeno pojedinačno.

## **3. Razmatranje Izvještaja o izvršenju Budžeta Općine Kakanj za period 01.01 – 30.06.2023. godine**

## **4. Razmatranje Izvještaja o izvršenju Tekuće budžetske rezerve za period 01.01 – 30.06.2023. godine**

**Predlačač:** Općinski načelnik

**Obradivač:** Služba za finansije

**Izvjestilac:** Džihad Berbić, pomoćnik općinskog načelnika

U diskusiji je učestvovala Marcela Ravlija.

**Marcela Ravlija:** se osvrnula na Izvještaj o izvršenju TBR i pitala da li postoje kriteriji za isplatu sredstava iz TBR-a, te ako postoje da li su javno dostupni, jer je iz tabele u prilogu vidljivo da se isplaćuju različiti iznosi za iste ili slične slučajeve.

**Džihad Berbić (odgovor):** je pojasnio da je TBR rashod koji nije direktno vezan za određenu vrstu rashoda, već je zakonom propisano da su to sredstva za neplanirane i nedovoljno planirane rashode u budžetu. Praksa je da izvršna vlast (kod nas općinski načelnik) prema svojoj ocjeni i prijedlogu službi raspoređuje ta sredstva, cijeneći svaki pojedinačni slučaj koji mora biti potkrijepljen zahtjevom i odgovarajućom dokumentacijom, nakon čega se donosi zaključak o isplati.

Nakon diskusije Vijeće je usvojilo Zaključak o prihvatanju Izvještaja o izvršenju Budžeta Općine Kakanj za period 01.01 – 30.06.2023. godine, sa 22 glasa ZA, bez glasova PROTIV i 4 glasa UZDRŽAN, te Zaključak o prihvatanju Izvještaja o izvršenju Tekuće budžetske rezerve za period 01.01 – 30.06.2023. godine, sa 20 glasova ZA, bez glasova PROTIV i 7 glasova UZDRŽAN.

#### **5. Prijedlog odluke o dopuni Odluke o subvencioniranju kamata za rješavanje stambenog pitanja mladih i refundiranju troškova ishodovanja rješenja o odobrenju izgradnje/urbanističke saglasnosti koja važi kao odobrenje za izgradnju**

**Predlačač:** Općinski načelnik

**Obradivač:** Služba za društvene djelatnosti, boračka pitanja, raseljena lica, izbjeglice i povratnike

**Izvjestilac:** Edin Aliefendić, pomoćnik općinskog načelnika

U diskusiji nije niko učestvovao i Vijeće je jednoglasno sa 29 glasova ZA usvojilo Odluku o dopuni Odluke o subvencioniranju kamata za rješavanje stambenog pitanja mladih i refundiranju troškova ishodovanja rješenja o odobrenju izgradnje/urbanističke saglasnosti koja važi kao odobrenje za izgradnju.

#### **6. Prijedlog odluke o imenovanju općinskog pravobranioca**

**Predlačač:** Komisija za imenovanje općinskog pravobranioca

**Obradivač:** Komisija za imenovanje općinskog pravobranioca

**Izvjestilac:** Bahrudin Arnaut, predsjednik Komisije

**Bahrudin Arnaut:** je podsjetio da je uz prijedlog odluke dostavljen Izvještaj Komisije o provedenoj proceduri i napomenuo da je Komisija usvojila Kriterije na osnovu kojih je izvršeno bodovanje prijavljenih kandidata, pri čemu je kandidatkinja Vesna Ajanović najbolje ocijenjena, te je predložio da se ista imenuje za općinskog pravobranioca.

U diskusiji je učestvovao Adnan Čobo.

**Adnan Čobo:** je pozvao sve da se prilikom budućih „ozbiljnih“ konkursa tačno precizira šta će tačno biti bodovano i da to budu relevantne stvari, a ne da se ulazi u nebitne detalje i da se isti boduju, kao što su npr. završeni jednodnevni ili dvodnevni seminari.

Nakon diskusije Vijeće je Odluku o imenovanju općinskog pravobranioca usvojilo jednoglasno sa 29 glasova ZA, nakon čega je općinski pravobranilac dala svečanu zakletvu u skladu sa članom 38. Zakona o pravobranilaštvu Zeničko-dobojskog kantona.

#### **7. Prijedlog odluke o davaju saglasnosti za uspostavu zaštićenog područja „Gornja Trstionica – Bukovica“**

**Predlačač:** Općinski načelnik

**Obradivač:** Služba za privredu, urbanizam i zaštitu okoline

**Izvjestilac:** Mirza Fazlić, pomoćnik općinskog načelnika

U diskusiji nije niko učestvovao i Vijeće je usvojilo Odluku o davanju saglasnosti za uspostavu zaštićenog područja „Gornja Trstionica – Bukovica“ jednoglasno sa 29 ZA.

#### **8. Razmatranje Izvještaja o radu Komisije za provođenje javnog nadmetanja – licitacije pri prodaji poslovnih prostora u vlasništvu Općine Kakanj s prijedlogom zaključka o utvrđivanju visine naknade za rad Komisije**

**Predlačač:** Komisija za za provođenje javnog nadmetanja-licitacije

**Obradivač:** Služba za imovinskopravne, geodetske poslove i katastar nekretnina

U diskusiji nije niko učestvovao i Vijeće je usvojilo Zaključak o prihvatanju Izvještaja o radu Komisije za provođenje javnog nadmetanja – licitacije poslovnih prostora u vlasništvu Općine Kakanj i utvrđivanju visine naknade članovima Komisije sa 27 glasova ZA, bez glasova PROTIV i 2 glasa UZDRŽAN.

#### **9. Prijedlog rješenja o imenovanju Komisije za utvrđivanje kriterija, postupka, načina davanja i izmjene naziva ulica, trgova, parkova, mostova, institucija, ustanova i naseljenih mjesta na području općine Kakanj**

**Predlačač:** Općinski načelnik

**Obradivač:** Služba za opću upravu, radne i zajedničke poslove, lokalnu samoupravu i mjesne zajednice

**Izvjestilac:** Bahrudin Arnaut, pomoćnik općinskog načelnika

**Bahrudin Arnaut:** je predložio Komisiju u sljedećem sastavu: Adis Mrkonjić – član, Branko Češlić – član, Zerina Kovač – član, Sanel Šabanović – član, Tomislav Đondraš – član, Nihad Hadžić – član, Elma Dervović – član i Sedin Karahodžić – član.

U diskusiji je učestvovao Armin Bašić.

**Armin Bašić:** je podsjetio da adresni registrar nikada nije uspostavljen. Smatra da se Komisija „gura u vatru“ jer će dodjeljivati nazive ulicama, a ne znamo odakle ni dokle se protežu pojedine ulice, niti šta obuhvataju. Rekao je da mu je poznato da je preko 2 hiljade kućnih brojeva pogrešno postavljeno jer ne pripadaju određenim ulicama, odnosno naseljima.

Nakon diskusije Vijeće je usvojilo Rješenje o imenovanju Komisije za utvrđivanje kriterija, postupka, načina davanja i izmjene naziva ulica, trgova, parkova, mostova, institucija, ustanova i naseljenih mjesta na području općine Kakanj, u sastavu: Adis Mrkonjić – član, Branko Češlić – član, Zerina Kovač – član, Sanel Šabanović – član, Tomislav Đondraš – član, Nihad Hadžić – član, Elma Dervović – član i Sedin Karahodžić – član sa 25 glasova ZA, 1 glas PROTIV i 2 glasa UZDRŽAN.

#### **10. Inicijativa građana o izdvajaju Novog Naselja Bare iz MZ Kakanj I i pridruživanju MZ Plandiše**

**Predlačač:** Općinski načelnik

**Obradivač:** Služba za opću upravu, radne i zajedničke poslove, lokalnu samoupravu i mjesne zajednice

**Izvjestilac:** Bahrudin Arnaut, pomoćnik općinskog načelnika

U diskusiji nije niko učestvovao i Vijeće je usvojilo Zaključak o prihvatanju inicijative građana o izdvajaju Novog Naselja Bare iz MZ Kakanj I i pridruživanju MZ Plandiše, sa 27 glasova ZA, bez glasova PROTIV i 2 glasa UZDRŽAN.

Vijeće je vodilo objedinjenu raspravu po tačkama 11. i 12. dnevnog reda, a glasanje je obavljeno pojedinačno.

## **11. Prijedlog rješenja o razrješenju Fakira Ajdinovića na mjestu predsjednika Komisije za Statut i propise**

### **12. Prijedlog rješenja o imenovanju predsjednika Komisije za Statut i propise**

**Predlačač:** Komisija za izbor i imenovanje

**Obradivač:** Stručna služba za poslove Općinskog vijeća

**Izvjestilac:** Mediha Mamela, predsjednica Komisije

U diskusiji nije niko učestvovao pa je Vijeće usvojilo Rješenje o razrješenju Fakira Ajdinovića na mjestu predsjednika Komisije za Statut i propise, sa 24 glasa ZA, bez glasova PROTIV i 2 glasa UZDRŽAN, te Rješenje o imenovanju Adnana Čobe za predsjednika Komisije za Statut i propise, sa 27 glasova ZA, bez glasova PROTIV i 1 glas UZDRŽAN.

## **13. Informacija o problematici korištenja, raspolađanja i upravljanja autobuskom stanicom u Kakanju**

**Predlačač:** Općinski načelnik

**Obradivač:** Služba za imovinskopravne, geodetske poslove i katastar nekretnina

**Izvjestilac:** Mukades Delibašić, pomoćnik općinskog načelnika

U diskusiji je učestvovao Dževdet Huskić.

**Dževdet Huskić:** je tražio pojašnjenje na način da se vijećnicima pojednostavljeno opiše o kojim nekretninama je riječ i šta se mijenja, bez da se navode katastarski brojevi parcela.

**Mukades Delibašić (odgovor):** je pojasnio da su u pitanju dvije parcele na prostoru autobuske stanice u kojima Općina Kakanj ima udio u vlasništvu i one se mijenjaju za parcelu koja je u vlasništvu Centrotransa, a radi se o autoparku, odnosno bivšoj garaži Centrotransa na prostoru Stare jame.

**Općinski načelnik:** je rekao da se radi o pokušaju rješavanja spora koji se vodi dugi niz godina u vezi sa vlasničkim/suvlasničkim dijelom autobuske stanice, gdje Općina ima udio u vlasništvu dvije parcele zajedno sa još četiri vlasnika/suvlasnika. Trenutno su se otvorile mogućnosti da se izvrši zamjena općinskog dijela vlasništva/suvlasništva na tim parcelama za parcelu bivši autopark Centrotransa na Staroj jami, a sve u cilju da se kvalitetnije planira razvoj tog dijela grada i grada u cjelini. Naglasio je da se radi o prvoj fazi realizacije posla, nakon čega slijedi procjena sudskog vještaka vrijednosti nekretnina koje se mijenjaju, pri čemu postoji mogućnost da neka od strana bude trebala drugoj doplatiti određen iznos sredstava. Podsjetio je da će se u svakom slučaju predmetna materija ponovo naći na Vijeću i da će Vijeće donijeti konačnu odluku da li će se zamjena realizovati.

Nakon diskusije Vijeće je usvojilo Zaključak kojim se prima k znanju Informacija o problematici korištenja, raspolađanja i upravljanja autobuskom stanicom u Kakanju i kojim se ovlašćuje općinski načelnik i nadležne općinske službe za poduzimanje svih potrebnih aktivnosti u vezi zamjene nekretnina suvlasničkog dijela, odnosno udjela u zajedničkom vlasništvu koji Općina Kakanj ima na nekretninama autobuske stanice Kakanj za nekretninu zv. „Autopark”, u vlasništvu Centrotrans d.d. Sarajevo, te da o svemu informišu Općinsko vijeće, sa 21 glas ZA, bez glasova PROTIV i 8 glasova UZDRŽAN.

## **14. Informacija o stanju sigurnosti na području Policijske stanice Kakanj za 2022. godinu**

**Predlačač:** Policijska stanica Kakanj

**Obradivač:** Policijska stanica Kakanj

**Izvjestilac:** Mirza Smajić, komandir Policijske stanice Kakanj

U diskusiji su učestvovali: Mujo Fafulić, Izudin Puščul i Adnan Čobo.

**Mujo Fafulić:** je pohvalio Informaciju iznesenu od strane komandira PS Kakanj i pri tome dao sugestiju da bi trebalo ukloniti havarисана vozila koja se nakon završenog uviđaja odlažu na prostoru ispred objekta PS Kakanj. Naime, svjestan je da se na taj način želi preventivno djelovati na nesavjesne vozače

da vide kakve pogubne posljedice može izazvati nesavjena vožnja, ali istovremeno se stvara neprijatna slika kod većine građana, a posebno djece koja prolaze pored takvih vozila, obzirom da se to sve odvija u samom centru grada. S toga je predložio da se ta vozila izmjeste, ukoliko postoji odgovarajući prostor.

**Izudin Puščul:** se zahvalio komandiru na izloženoj Informaciji i postavio pitanje kakva je sigurnosna situacija na prostoru općine Kakanj i da li ima dovoljno policijskih službenika da obezbjede sigurnost građana, a sve imajući u vidu dešavanja u proteklom periodu.

**Mirza Smajić:** je ustvrdio da, bez obzira na dešavanja u posljednja 2-3 mjeseca, građani Kakanja ne trebaju da brinu za svoju sigurnost, jer je ona na visokom nivou, pri čemu se uspješno preduzimaju i izvršavaju svi poslovi iz nadležnosti PS Kakanj.

**Adnan Čobo:** je rekao da je Informacija onakva kakva treba da bude i predstavlja stanje onakvo kakvo jeste. Međutim, smatra da bi ista trebala da sadrži i drugi kontekst, a to je da se daju mišljenja od strane vijećnika, kako bi se i kroz tu dimenziju poboljšao rad policije, a svakako i poboljšao status policijskih službenika. Smatra da bi trebalo posvetiti pažnju većem stepenu obrazovanja i edukacije policijskih službenika, kako prilikom zasnivanja radnog odnosa, tako i tokom karijere, a sve imajući u vidu značaj policije za jedno društvo i činjenicu da se na neki način slika društva ogleda kroz rad, ponašanje i obrazovanost policijskih službenika u širem smislu. S toga je pozvao komandira da se obrati Vijeću za pomoć, iako svjestan da isto nema direktnе nadležnosti u tom segmentu, u dijelu gdje Vijeće može djelovati.

Nakon diskusije Vijeće je usvojilo Zaključak o primanju k znanju Informacije o stanju sigurnosti na području Policijske stanice Kakanj za 2022. godinu, sa 24 glasa ZA, bez glasova PROTIV i 3 glasa UZDRŽAN.

Predsjedavajući je zaključio rad 32. redovne sjednice Općinskog vijeća u 11:20 h.

Audiozapis sa sjednice Vijeća pohranjen je u elektronskoj formi (CD-u) i sastavni je dio ovog Zapisnika.

**SEKRETAR  
OPĆINSKOG VIJEĆA  
(po ovlaštenju)**  
Emir Zaimović

**PREDSJEDAVAJUĆI  
OPĆINSKOG VIJEĆA**  
Slaven Katičić